

**TEZAUUR LITURGIC**  
**27 NOIEMBRIE**

**ACATISTUL**  
**SF. IERARH**  
**IACOB,**  
**EPISCOPUL**  
**ROSTOVULUI**



**MOSCOVA, 2000**



# **Акафист**

## **святителю Иакову, епископ Ростовскому, чудотворцу**

### **Кондак 1**

---

Избранный угодниче Христов и чудотворче, пресветлый Ростова светильниче и всяя Российския страны теплый заступниче, похвальное пение приносим ти: ты же, яко имеяй дерзновение ко Господу, от всяких нас бед сохраняй, да любовь зовем тебе:

Радуйся, святителю Иакове, преславный чудотворче.

### **Икос 1**

---

Ангелов Творец земнаго ты ангела и человека небеснаго показа нам воистинну, отче Иакове: темже тебе, от рождения Богу освященнаго и дивным видением во архиереа граду Ростову предвозвещеннаго, ублажаем похвалами сими:

Радуйся, благословенная отрасле родителей благочестивых.

Радуйся, Отца Небеснаго чадо  
превозделенное.

Радуйся, от юности твоя благодати  
преисполненный.

Радуйся, рабе Божий, благий и верный.

Радуйся, града Ростова архиерею  
богоизбранный.

Радуйся, всем верным пастырю предобрый.

Радуйся, на Небеси пребываяй у Господа во  
обителех Его.

Радуйся, благодатною помощию не оставляяй  
и нас на земли живущих.

Радуйся, благодати Святаго Духа сосуде  
благоуханный.

Радуйся, милосердия Божия к людем чаше  
неистоцимая.

Радуйся, селение славы Божия, душу твою  
паче Моисеевы исполнившая.

Радуйся, промысления Божия сокровище  
пречудное.

Радуйся, святителю Иакове, преславный  
чудотворче.

## Кондак 2

---

Видя Господь Бог непорочную душу твою, отче Иакове, предустави тебе быти архипастырю Церкви Ростовския, и яко невесту добру тебе ю вручи избраннику Своему, да пасеши богомудренно на пажитех живоносных и будеши образ благочестия твоему стаду, научая всяк возраст верных воспевати: Аллилуиа.

## Икос 2

---

Разум богопросвещен свыше тебе даровася, святителю Божий, имже зловерие еретика Маркиана уразумел еси, лжеучением иконоборным тишину Церкви Ростовския смутити дерзнувша, темже сего ухищренное лжесловесие мечем Божия слова отразил еси и паству твою от губителя оградил еси, тебе благочестно зовущую:

Радуйся, Православия поборниче.

Радуйся, зловерия обличителю.

Радуйся, благочестия учителю.

Радуйся, злочестия искоренителю.

Радуйся, достоподражательный икон святых почитателю.

Радуйся, ереси иконоборныя отгнателю.

Радуйся, правоверующих присное утверждение и утешение.

Радуйся, благочестно живущих бодрость и укрепление.

Радуйся, крепосте Господня, от враг Креста Христова неодоленная.

Радуйся, обуреваемым убежище благоутишное.

Радуйся, фараона адскаго посрамителю.

Радуйся, в горний Иерусалим наш путеводителю.

Радуйся, святителю Иакове, преславный чудотворче.

### **Кондак 3**

---

Сила Божия укрепляше тя в служении твоём, всесвященный отче, многия бо скорби и труды подъял еси, и вся, любве ради Возлюбльшаго тя, претерпел еси, благодарственно воспевая Церкви Зиждителю: Аллилуиа.

---

## Икос 3

Имый во уме и сердцы твоём словеса Христовы, не осуждати без милости согрешающыя, о жене грешнице, на смерть осужденней и к твоему заступлению притекшей, милосердствовал еси, и сию от смерти свободил еси и на покаяние наставил еси, Владыце Христу, блудницу помиловавшему, подражая, темже вопием ти умиленно:

Радуйся, Евангелиа Христова истинный последователю.

Радуйся, милосердия Иисусова к кающымся верный подражателю.

Радуйся, яко суд человеческий на милость преложил еси.

Радуйся, яко грешницу, на смерть осужденную на покаяние соблюл еси.

Радуйся, заступниче беспомощных.

Радуйся, покровителю напаствуемых.

Радуйся, не осудивый, и неосужденный по заповеди Господней.

Радуйся, милостивый, и помилованный, по обетованию Христову.

Радуйся, отеческою любовью немощи наша покрываяй.

Радуйся, под криле защищения твоего прибегающыя охраняяй.

Радуйся, яко и праведный гнев Божий ходатайством твоим от нас отвратити силен еси.

Радуйся, яко и душу твою положить за нас истинно готов был еси.

Радуйся, святителю Иакове, преславный чудотворче.

#### **Кондак 4**

---

Буря клеветы напрасныя и негодования сатанинского возшуме на тя, святителю Христов, егда жену грешную помиловал еси и суд княжий святительским твоим словом на милость пременил еси: человецы же плоти, лишеннии разума духовнаго, яко сообщника беззаконию ея тя оклеветаша; но ты, от тех поношаем, в кротости пел еси Сердцеведцу Богу: Аллилуиа.

#### **Икос 4**

---

Слышавше людие Ростовстии клевету на тя злобную, глаголом неподобным веру яша, и

якоже древле иудее на Христа, на тя пастыря своего руце возложиша, и от престола святительскаго изгнаша, не постыдевшеся святыни сана твоего, ни седин твоих старческих. Мы же, безвинное твое изгнание поминающе, яко страдальца истины тя ублажаем и зовем:

Радуйся, поношения и клеветы человеческия мужественно претерпевый.

Радуйся, блаженство гонимых правды ради унаследивый.

Радуйся, иго скорбей терпеливодушно понесый.

Радуйся, чистоту безстрастия сохранивый неврежденну.

Радуйся, благоуханный крине непорочнаго девства.

Радуйся, неувядаемый цвете ангельския чистоты.

Радуйся, защитниче неправедно оклеветуемых.

Радуйся, грозное вразумление неразумно клеветущих.

Радуйся, в горниле скорбей паче злата очищенный.

Радуйся, терпением напастей Иову Многострадальному подобный.

Радуйся, истинный последователю распятого Учителя.

Радуйся, Креста Его мужественный и усердный носителю.

Радуйся, святителю Иакове, преславный чудотворче.

### **Кондак 5**

---

Боготечное шествие твое по водам Нера-езера на мантии святительстей видевшие людие Ростовстии, непорочность твою абие уразумеша: темже о своем согрешении сокрушающеся, вслед тебе по водам идущаго потекоша, о прощении и разрешении своая вины слезно вопиюще. Ты же, незлобиве отче, прощение тем даровал еси и поучал еси тыя ко осуждению ближняго нескорым быти, но грехи своя памятствующе, смиренно пети Спасителю грешных: Аллилуиа.

---

## Икос 5

Видев суету мира сего, благоутишие пустыни и житие безмолвное паче престола святительскаго, отче, возлюбил еси: сего ради кущу малу себе воздвиг, постом и молитвою в ней Христу благоугождал еси и обитель иноческую создал еси, в нейже тебе зовем сице:

Радуйся, преподобных удобрение.

Радуйся, постников похвало.

Радуйся, безмолвия рачителю.

Радуйся, молитв благоуханных фимиаме.

Радуйся, слезы молитвенных обильно источивый.

Радуйся, плачем временным блаженство вечное улучивый.

Радуйся, обители твоея славо и украшение.

Радуйся, монашествующих в ней тихая отрадо и утешение.

Радуйся, сокровище нетленное, от молитв наших некрыющееся.

Радуйся, кладезю милостей Господних, от нас не утаивыйся.

Радуйся, светильниче Господень, Церковь Христову озаряй.

Радуйся, теплото любви божественная, верных сердца согревающая.

Радуйся, святителю Иакове, преславный чудотворче.

### **Кондак 6**

---

Проповеднику покаяния, великому святителю Златоусту воистинну подобен еси, святителю досточудне, якоже учением твоим сладковещанным, тако и изгнанием безвинным, в нем же незлобия твоего высоту показал еси и богомудрия глубину открыл еси: изменив бо светлая одежды святительския на убогия рубы иноческия, крепко подвизался еси в бдениих и пощениих деннонощных, в преподобии и святыни немолчно воспевал Богу: Аллилуиа.

### **Икос 6**

---

Возсиял еси, яко светило богосветлое, пастве твоей сиянием высоких добродетелей, отче Иакове, молитвенниче о нас неусыпный по долгу воспевающих тя сице:

Радуйся, великий угодниче Божий, многими дарованиями благодатными украшенный.

Радуйся, преславными чудесы от Бога прославленный.

Радуйся, светом святыни Вышняго озаренный.

Радуйся, красотой жизни небесныя осиянный.

Радуйся, прерадостное верных чад Церкви утешение.

Радуйся, темным силам адским нестерпимое слышание и видение.

Радуйся, блаженство чистых сердцем унаследивый.

Радуйся, лицезрения Божия присно наслаждайся.

Радуйся, душу твою во обитель Пресвятыя Троицы устройый.

Радуйся, яко всем житием твоим Господа славно прославил еси.

Радуйся, града Ростова хранителю и заступниче.

Радуйся, всея Российския страны предстателю и молитвенниче.

Радуйся, святителю Иакове, преславный чудотворче.

### **Кондак 7**

---

Хотяй устроить во обители твоей храм Пресвятыя Богоматере, Иакове богомудре, в строении церковнем сам труждался еси, и в нем молитвы теплыя ко Христу Богу и Его Пречистой Матери возносил еси, до конца дней твоих поя: Аллилуиа.

### **Икос 7**

---

Новаго твоя Ноя начальника ковчега мысленнаго, сланья воды моря житейскаго невредно прешедшаго, верою познаваем, отче наш Иакове. Помози убо и нам спасение улучшить и тихаго пристанища от житейских плаваний достигнути, тебе зовущим:

Радуйся, кораблем силы и хранения Божия естество водное немокренно прешедый.

Радуйся, от бурь житейских прибежище всем даруяй.

Радуйся, вертограде мысленный, плодов духа обильно исполненный.

Радуйся, саде духовный, цветы добродетелей  
присно благоухаяй.

Радуйся, свеще, в молитвах к Богу за нас  
неугасимо горящая.

Радуйся, миро драгоценное, Церковь  
Христову благоухавшее.

Радуйся, маслино благоплодная, елей  
милосердия Божия обильно источающая.

Радуйся, источниче неизсякаемый чудес  
благодати.

Радуйся, скорбящих присно готовый  
утешителю.

Радуйся, болящих безмездный целителю.

Радуйся, во всех бедах наших и напастех  
верное прибежище.

Радуйся, всех милостей Божиих нам присный  
ходатаю.

Радуйся, святителю Иакове, преславный  
чудотворче.

### **Кондак 8**

Странно бе видети, яко во плоти ангельское  
воистинну житие пожил еси, Иакове  
богоблаженне. От юности бо твоея Христа тепле

возлюбив, Тому до старости маститыя, яко добр делатель, неленостно поработал еси: темже с возжженным светильником души твоея сподобился еси внити в чертог Небеснаго Домовладыки, идеже со всеми святыми присно поеши Ему: Аллилуиа.

### **Икос 8**

---

Весь освящен благодатию Духа Святаго богоносец показался еси святительским служением и равноангельным житием твоим, еже ублажающе, воспеваем ти сице:

Радуйся, добрый ангеле Церкви Ростовския.

Радуйся, наш апостоле, в трудех и болезнях Христа благовествовавый.

Радуйся, исповедниче веры, неправедное гонение претерпевый.

Радуйся, любовь Божию на муки себе преданием запечатлевый.

Радуйся, постниче и молитвенниче предивный.

Радуйся, пастырю и учителю предобрый.

Радуйся, слезный сеятелю радости небесныя.

Радуйся, заповедей Христовых верный исполнителю.

Радуйся, трудолюбивый делателю винограда Христова.

Радуйся, неусыпный молитвенниче о твоём стаде.

Радуйся, благодатный укрепителю немоществующих.

Радуйся, благословенное утверждение подвигом добрым подвизающихся.

Радуйся, святителю Иакове, преславный чудотворче.

### **Кондак 9**

---

Всякия беды и скорби и нужды избави обитель твою и град твой, святителю отче Иакове, и не помяни неправд наших, и не премолчи, вопия за ны ко Господу, да сподобит и нас вкупе с тобою воспети Ему: Аллилуиа.

### **Икос 9**

---

Ветия Церкви Российской, великий святитель Димитрий, пришед во обитель твою, отче наш Иакове, покой свой вечный в ней духом предрече, глаголя: «Се покой мой, zde вселюся во

век века». С тем убо Престолу Царя Славы предстоя, молися выну о нас зовущих ти:

Радуйся, чаше неистощимая милостей к нам Господних.

Радуйся, умиления реко благодетекущая.

Радуйся, друже Христов, до конца верен Ему пребывый.

Радуйся, сожителю святых, присный богу.

Радуйся, яко смерть твоя честна и память твоя с похвалами.

Радуйся, яко мзда твоя на небеси велика и венец твой нетленен.

Радуйся, со святителем Димитрием крепкий о нас молитвенниче.

Радуйся, со всеми святыми о всех верных боголюбезный ходатаю.

Радуйся, покрове и заступление притекающих под кров обители твоея.

Радуйся, помощи скорая и утешение всем призывающим тя.

Радуйся, радости страны Ростовския.

Радуйся, славо всея Державы Российския.

Радуйся, святителю Иакове, преславный чудотворче.

### **Кондак 10**

---

Спастися хотящим и к Богу с покаянием притекающим, помощник усерден являешия, отче наш Иакове. Аще бо и преставился еси от нас смертию временною, но духом твоим неотступен от нас пребываеши, помощь благодатную неоскудно нам источая. Сего ради благодарственно воспеваем Дивному во святых Своих Богу: Аллилуиа.

### **Икос 10**

---

Стену ограждения обители твоей исповедуем тя, святителю Христов: юже бо при жизни твоей трудолюбно устроил еси, сию и доньне нерушиму, славну и благолепну храниши, и в ней, яко сокровище многоценно, многоцелебныя мощи твоя сокрыл еси нам, восхваляющим тя сице:

Радуйся, благодарованный наш заступниче.

Радуйся, милосердый душ и телес наших целебниче.

Радуйся, в сонних и видениях верныя посещай.

Радуйся, в бедах и скорбех сущым утешение  
низпосылай.

Радуйся, болезни неисцельныя скоро врачуай.

Радуйся, в напастех и гонениих страждущыя  
заступай.

Радуйся, богатство утешения, туне всем  
подаемое.

Радуйся, сокровищнице благ вечных, всем  
отверстая.

Радуйся, обители твоея покрове и  
ограждение.

Радуйся, иночествующих в ней  
благоскорбящих радование.

Радуйся, избавителю наш от всякия нужды и  
печали.

Радуйся, хранителю наш от всякаго  
озлобления вражия.

Радуйся, святителю Иакове, преславный  
чудотворче.

## **Кондак 11**

---

Пение молебное во умилении сердечнем  
приносим ти, чудотворче предивный, и к месту  
покоища твоего с любовью теплою припадающе,

благодарим Христа Бога, даровавшего нам такового заступника и отца благосердаго, вопиюще Ему: Аллилуиа.

### **Икос 11**

---

Светоносныя лучи божественных милостей сокровенно нам изливаеши, святителю Божий, сего ради прославися имя твое во всей стране нашей православней, яко чудотворца преславна и предстателя многомоцна ко Господу ты почитающей: темже и мы, заступления твоего просяще, вопием ти из глубины сердечныя:

Радуйся, ангеле земный и человеце небесный.

Радуйся, горняго Иерусалима жителю всеблаженный.

Радуйся, сопричастниче радости Господа твоего.

Радуйся, созерцателю неприступныя славы Триипостаснаго Божества.

Радуйся, славою нетленною украшенный на земли.

Радуйся, венцем безсмертия увенчанный на небеси.

Радуйся, вожделенное Отечество Небесное унаследивый.

Радуйся, и земное Отечество твое в молитвах не забываяй.

Радуйся, от земных к небесным дух наш возвышаяй.

Радуйся, к сокровищу нашему, Сладчайшему Иисусу, сердца наша обращаай.

Радуйся, заре Божия света.

Радуйся, тихое сияние Божией благодати.

Радуйся, святителю Иакове, преславный чудотворче.

### **Кондак 12**

---

Благодать, данную ти от Бога и велие сострадание твое к страждущим, святителю Иакове, ведяще, светло празднуем святую память твою, и тебе, покровителю нашему, молебныя похвалы возносяще, поем Всещедрому Богу: Аллилуиа.

### **Икос 12**

---

Поюще подвиги твоя и чудеса, святителю достоблаженне, честное успение твое славим, и

яко пастыря и заступника нашего величаем тя  
звании сими:

Радуйся, Пресвятая Троицы верный  
поклонниче.

Радуйся, Пресвятая Богородицы истинный  
избранниче.

Радуйся, архангелов и ангелов собеседниче.

Радуйся, Предтечи Господня и всех святых  
блаженный сожителю.

Радуйся, Церкви небесная и земная  
украшение.

Радуйся, о пастве твоей земной молитвенниче  
неусыпный.

Радуйся, яко присно со Христом царствуеши.

Радуйся, яко непрестающая радости Его  
сподобился еси.

Радуйся, угодниче Божий премилосердый.

Радуйся, пастырю наш прекроткий.

Радуйся, праведных веселие.

Радуйся, грешных упование.

Радуйся, святителю Иакове, преславный  
чудотворче.

## Кондак 13

---

О преславный чудотворче и святителю Христов Иакове! К тебе усердно грешнии прибегаем, и яко истиннаго отца и пастыря нашего прилежно молим: пролей теплую молитву о нас грешных ко Господу, да зде от всякия напасти нас избавит и будущия да измет муки вся вопиющыя Ему: Аллилуиа.

Этот кондак читается трижды, затем икос 1-й и кондак 1-й

## Молитва

---

О пречудне и преблаженне отче, святителю Христов Иакове! С верою и любовью к тебе припадающе, молим тя: огради нас святыми твоими молитвами от всякия беды, скорби и болезни, и от всякаго праведно движимаго на нас гнева Божия, испроси нам тихое и безмятежное житие, во всяком благочестии и чистоте, и помози нам спасение улучити и Царствия Небеснаго достигнути.

Ей, угодниче Божий и заступниче наш! Не призри усерднаго моления сего нашего, но призри на ны милостивно и умоли о нас всещедраго Человеколюбца Бога, да не погибнем

люте в беззакониях наших, но да сподобимся с тобою и всеми святыми славить и воспевать Всесвятое Имя Его, Отца и Сына и Святаго Духа, ныне и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**